

PAGINA DI ANTAÑO

ALGO TOCANTE DI ORO NA Aruba.

Redaccion di Revista Warero tabata di bishita na cas di Beto Vrolijk, kende ta biba na Pos Chiquito, y Beto tin 63 aña di edad, y na cas di Beto nos a topa cu Mathias Maduro, kende ta biba na Balashi y Mathias tin 80 aña di edad. E dos personanan aki a conta nos redaccion algun cuenta di tempo nan pasa, y cual ta di gran interes pa esnan cu no sa. Beto a conta nos redaccion algun cos cu e mes a pasa aden, y tambe loke su wela a conte, y Beto su wela ta un persona cu a yega e bunita edad di 115 aña.

Tempo cu Beto su Wela tabata un mucha muher di 15 aña, nan a wordo batisa pa un pastoor cu sa bini for di Venezuela, y esey ta wordo haci na un lugar na playa cu jama Socotoro, e tempo nan ey no tabata tin misa di playa ainda, y es tempo nan ey e trabao cu tabata haci hopi aki na Aruba tabata Cochonia, pa haci e trabao aki, nan ta haci uso di un tuna cual no tin sumpinia, esaki ta wordo buta na un monton grandi di mas of menos 10 meter cuadra, y nan ta coy un insecto manera un carpata pero mas grandi, y e animalnan aki ta wordo buta hunto cu e tuna aki, y despues di cinco dia e tunanan aki ta yen-yen di e insectonan aki, despues nan ta usa un banganja di palo den cual e insecto aki ta wordo deposita, y ta wordo bendi pa 10 cents pa liber, esaki ta e promer trabao cu wela di beto a haci tempo cu e tabata un mucha muher hoben. Despues di Cochonia a bini e trabao di cortamento di Aloë.

Beto a conta nos redaccion cu como un mucha chiquito e ta sinta banda di su wela, kende tabata conta nan tur cos di e tempo nan aya, wela tabata conta nan di Bushiribana, pero e no ta corda ki tempo Bushiribana a cuminsa funciona, pero Balashi si, esey ta na unda tabata traha cu oro, y aki na Balashi tabata tin basta catibo tabata traha, nan tabata bini cu nan shonnan, y bastante oro a wordo saca aki na Aruba, a wordo bisa cu nan a stop cu e trabao aki debi cu no tin suficiente oro mas, pero ningun hende sa si esaki ta verdad. Un di e quimico Arubiano di e temponan ey tabata Chepi Zeppenfeldt, segun Beto su Wela a conte, e oro tabata carga ariba burico hiba playa. Den

transportamento di oro pa playa nan a yega di perde 4 caha di oro, y esey a sosode entre Balashi cu Playa, pero ningun hende no sa ta con esaki ta sosode, y nunca nan a wordo haya bek.



E temponan ey bo tabata haya hopi hende tabata rondia oro den mondi, tabata tin un homber cu a haya un pida ora basta grandi, y ora cu e a purba hinca su oro den e cachu cu nan ta usa pa hinca ora aden e no kier a dreña, pesey e lugar aki yama te ainda nega cachu, tin un lugar aki na Aruba cu yama paga harina, cual a haya su nomber debi cu e temponan ey e hendenan ta busca oro, y tabata tempo cu cuminda tabata hopi scars na Aruba, y ora nan bolbe bek si nan haya un pida oro nan ta pasa cumpra y paga loke nan debe, despues a bini un Hulandes, y e homber aki a tira dos hende cu ta busca oro mata den mondi, pero segun nan ta bisa cu e tabata tin orden pa haci esaki, e tabata cana cu su documentonan hinca den su dek di zapato. Despues a bini un homber cu tabata wordo yama Mr. Knight kende a sonda banda di Shi Darahaca (nomber indian) y tambe na Mira Lamar, cual ta e mina major di Aruba, e shaft major, 999 pia, esaki kier meen 24 kilat, y e homber aki tabata tin un mapa cune, cual tabata tin tur e nombernan di e lugarnan aki na Aruba na unda tin oro, pero hopi oro. Como mucha Beto tambe a traha cu Mr. Knight y e compania a haya un nomber cual tabata compania di penchi, hopi

(Cont. pagina 7)

sacu cu santo a wordo saca y hiba playa, na unda Beto su tata tabata laba e santonan aki, y ora tabata wordo saca, y pariba di West Punt tambe oro a wordo saca, pero aki nan no tin mina, solamente na Mira Lamar, ey nan so tin Mina. For di Aruba Mr. Knight a bay biba na Argentina, debi segun el a bisa, cu e ta bieuw caba y e no tin nodo di traha mas. Despues a wordo sonda pa otro hende aki na Aruba, pero ningun no sa kiko mas tin den nos tera.

Den un di e minanan na unda nan a yega te cu 999 pia nan a haya cristal y si sigui bora te cu 1250 lo nan a encontra cu e banki di oro.

Segun e dos personanan aki, a wordo bisa cu algun di e minanan a basha den otro, pero segun grandi




nan a conta, e minanan aki a wordo bula.

Mathias a conta nos redaccion un cuenta cu e bieuwnan a yega di conta, un biaha nan a yega di coy pegasaya, y for di e simiña nan a mula y traha un pan dushi, y tambe por a bati pan. Mathias ta un persona cu a yega di traha na Cuba tambe, corta caña. Mathias a bay Cuba sin cu su hendenan tabata sa. Mathias tabata falta dos dia pa e haci 11 aña, su mayornan a mande playa bay haci respondi y como cu e dia ey nan tabata tuma hende pa bay Cuba. Mathias tambe a dicidi di bay, dia Mathias su tata a bay Cuba pa buske, ya Mathias tabata tin 16 aña caba.

Cu hopi entusiasmo e dos personanan aki a sinta conta nos redaccion di loke nan a tende di nan grandinan, tin masha hopi cuenta mas cu nos no por publica den nos edicion aki, pa falta di espacio, pero tur nos grabacion nan cu nos revista haci ta wordo warda, y nos tin hopi mas cu

nos por scirbi di loke Mathias y Beto a conta nos redaccion, por ehempel con kalki ta wordo traha, tocante añanan malo cu tabata tin na Aruba, y tambe den ki sorto di piedra bo por haya oro y mucho mas, y tur ta di gran balor educativo. Revista Warero ta gradici Sr. Beto Vrolijk y Sr. Mathias Maduro pa nan tempo cu nan a dedica na nos redaccion, y pronto nos lo publica mas di loke nan a conta nos redaccion



LESA WARERO

CANTON SUPERMARKET.



El supermercado cu articulonan di alta **calidad**, y na unda bo florin ta bal mas.

Cumprando serca nos, bo tin chens di gana premio tur siman.

Nos ta situa den
J.G. Emanstraat 35
(Tel: 1122)